

Aspera Parthinûm frigora verticibus;
Quaeque elata mari contra stat Tauridos ora
Cervinam capitis tortilis in speciem,
At nimios aestus genitabilis aura Favoni
Hesperii Melites mulcet ab aequoribus,
Et late in bibula mollissima balnea arena,
Balnea nocturnis cognita Nereisin.
Bacchus amat propriam generoso palmite Lesbon,
Pallas Athenarum moenia nobilium,
Sed neque Lesboae contendat vinitor uvae
Collibus, o Elaphi, plus placuisse tuis;
Nec se Palladia felices arbore rami
Usquam Cecropiis tam bene contulerint
Arboribus; fructuque tibi bene olentis olivi
Appula det victas, Tuscaque terra manus,
Hic veniunt herbae, mitis quas educat aer,
Et matutino ros novus imbre lavat;
Hic pecori fructus, niveique hic copia lactis,
Et prima est tonsis gratia velleribus.
Hic etiam ipse pater virus serpentibus atris
Abstulit, et nulli posse nocere dedit.
Tu quoque tu plures hic pro una, Pallas, Arachne
Textilis invenias laude magisterii.
Non adeo faciles vinci fortasse puellas,
Artifices telae stamina Maeoniae
Nocturna torquere manu, torquere diurna,
Et somnum argutis fallere carminibus,
Neve virum minor ingeniis est gloria: ad artes
Quilibet est illic impiger omnigenas;